

**Biar Pakatan teraju PSC untuk SPR, kata pemimpin pembangkang
Malaysian Insider
June 2, 2013
Oleh Zurairi AR**

KUALA LUMPUR, 2 Jun — Jawatankuasa Khas Pilihan Parlimen (PSC) yang diwujudkan bagi mengawal selia Suruhanjaya Pilihan Raya (SPR) harus diketuai oleh Pakatan Rakyat (PR) bagi mengelakkan konflik kepentingan kata pemimpin daripada gabungan pembangkang.

Dalam usaha untuk meningkatkan keyakinan rakyat terhadap badan pengendali pilihan raya itu, Perdana Menteri Datuk Seri Najib Razak semalam mengumumkan SPR akan dikawal selia oleh panel PSC yang merangkumi pemimpin daripada kedua-dua parti politik kerajaan dan pembangkang bagi meningkatkan kredibiliti mereka.

"Bagi meyakinkan PR bahawa usaha ini adalah niat yang ikhlas bagi mengembalikan keyakinan rakyat terhadap SPR, ia seharusnya diketuai PR," kata Pakar Strategi DAP, Ong Kian Ming kepada The Malaysian Insider.

Menurut pengarah pemerhati pilihan raya Malaysian Electoral Roll Analysis Project (MERAP), ianya disebabkan rasa tidak percaya terhadap SPR. Lebih tinggi dalam kalangan pemimpin PR berbanding BN.

Pengendali pilihan raya itu dituduh memihak kepada BN oleh pembangkang dan membantu parti dengan 13 parti komponen itu kekal berkuasa dalam Pilihan Raya 2013 pada 5 Mei lalu.

"Kita sudah lihat contoh PSC untuk pembaharuan pilihan raya tidak menunjukkan banyak tindakan berkesan diambil ... salah satu puncunya kerana ia diketuai BN," katanya merujuk kepada jawatankuasa yang dipengerusikan pemimpin komponen BN, Parti Bersatu Sabah (PBS) Datuk Seri Dr Maximus Ongkili.

Jawatankuasa Kerja PAS Pusat, Dr Dzulkefly Ahmad pula membandingkan situasi Jawatankuasa Kira-Kira Wang Negara (PAC) di kebanyakan negara-negara Komanwel, yang menjadi lumrah pemimpin pembangkang mempengerusikan jawatankuasa berkenaan.

Di negara yang mempunyai jawatankuasa berkenaan, PAC biasanya bertanggungjawab memantau perbelanjaan kerajaan bagi memastikan ketelusan akauntabiliti.

"Sesiapa yang memegang kepentingan tidak boleh mengetuainya," kata Dzulkefly, merujuk kepada terma perundangan "nemo iudex in causa sua", yang bermaksud "tiada pihak boleh menghakimi kesnya sendiri."

Pemimpin PAS itu berkata, kepentingan seperti itu boleh dilihat dalam cadangan pembaharuan sistem "first past the post" yang memberi kelebihan kepada parti pemerintah.

Naib Presiden PKR, Fuziah Salleh bagaimanapun menegaskan pembaharuan pilihan raya perlu dilaksanakan supaya SPR lebih adil, telus, dan bebas sebelum PR mengetuai PSC itu dapat dilaksanakan.

Ahli Parlimen Kuantan itu turut beranggapan langkah diambil Najib adalah cara mengalih perhatian rakyat terhadap dakwaan penipuan pilihan raya yang dibangkitkan PR.

Sejak pengumuman keputusan Pilihan Raya 2013, PR telah menganjurkan Himpunan "Black 505" di seluruh negara menolak keputusan pilihan raya.

Penganjurnya, Datuk Johari Abdul turut berkata himpunan berkenaan akan terus dijalankan walaupun Yang Di-Pertuan Agong telah menitahkan agar setiap rakyat menerima keputusan pilihan raya.

Ong turut mencadangkan anggota PSC itu tidak semestinya menteri yang telah dibebani tugas berat namun diberikan kepada kelab penyokong.

Sementara itu, Dzulkefly juga mencadangkan kemungkinan pakar berkecuali disertakan dalam jawatankuasa berkenaan kerana ia perlu dilakukan berdasarkan merit bukannya taraf seseorang sebagai MP.

"Saya cadangkan jangan hanya meletakkan keanggotaan kepada MP, ia boleh termasuk dalam kalangan ahli akademik, pengkaji, bekas hakim," katanya.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/biar-pakatan-teraju-psc-untuk-spr-kata-pemimpin-pembangkang/>